

# **POLITIVEDTEKT**

**for Volda kommune**

**Vedteken av Volda kommunestyre 24.oktober 1996.  
stadfest av Justis- og politidepartementet  
09.desember 1996.**

# POLITIVEDTEKT

## FOR

## VOLDA KOMMUNE

Vedteken av Volda kommunestyre i møte 24.10.96, sak 184/96.  
Stadfest av Justis- og politidepartementet 09.12.96.

### Lovheimel:

Lov om politiet av 04.august 1995 nr. 53, § 14.

### **Kapittel I: Allmenne føresegner**

#### **§ 1 Offentleg stad**

Med offentlig stad er i denne vedtekta meint gate, veg, her medrekna fortau, stig, park, torg e.l., plass, bru, bryggje, kai, strand, anlegg eller annan stad der det er allmenn ferdsle eller som er bestemt for allmenn ferdsle.

#### **§ 2 Festar, brukar, leigar eller styrar av hus eller grunn**

Dei plikter som er lagd på eigar av hus eller grunn, kviler også på den som festar, brukar, leiger eller styrer hus eller grunn.

### **Kapittel II: Orden på offentlig stad**

#### **§ 3 Ro og orden på offentlig stad**

På eller like attmed offentlig stad må ingen vere med i oppstyr, samanstimling, larm eller bråk som skiplar den allmenne orden eller ferdsla.

Når mange menneske samlar seg nær inngang til forsamlingslokale, sports plass, utsalsstad, stoppestad e.l., skal dei stå i kø og elles rette seg etter dei pålegg som politiet eller arrangøren gjev for å halde oppe den allmenne orden eller for å regulere ferdsla.

#### **§ 4 Song og musikk, reklame m.m.**

Den som på eller ut mot offentlig stad vil føre fram song eller musikk, skipa til framsyning eller gjere bruk av høgtalar, må på førehand gje melding til politiet.

Det same gjeld den som på eller nær offentlig stad ynskjer å dele ut eller spreie opprop, lysingar, reklame e.l., eller bruke gåande, køyrande eller flygande reklame.

## **§ 5 Farleg eller skremmande verksemd**

På, ut over eller like attmed offentleg stad er det forbode:

1. å skyte med gevær eller anna skytevåpen eller med boge, sprettert e.l.,
2. å brenne av krutt, fyrverkeri eller sprengstoff utan at politiet har gjeve løyve,
3. å kaste eller sleppe stein, snøball eller anna som kan vere til skade eller ulempe for dei som ferdast der.

Det er forbode å bere ladd skytevåpen på offentleg stad.

## **Kapittel III: Sikring av ferdsla**

### **§ 6 Hindringar**

På eller ut over offentleg stad er det forbode å setje eller hengje noko som kan vere til hinder eller ulempe for ferdsla.

Markiser skal vere festa så høgt at underkanten minst er 2,50m over bakken.

### **§ 7 Sport, leik**

Politiet kan sette forbod mot aking og andre former for sport, leik eller spel på bestemt offentleg stad der dette er påkravd av omsyn til ferdsla eller den allmenne orden.

### **§ 8 Sperring av fortau m.m.**

Krev byggjearbeid e.l. at gate, veg eller annan offentleg stad vert heilt eller delvis sperra for ei avgrensa tid, lyt ein på førehand søkje løyve frå politiet. Politiet kan setje nærare vilkår for løyvet.

### **§ 9 Sprengingsarbeid**

Sprenging på eller like attmed offentleg stad skal på førehand meldast til politiet. Politiet kan krevje særlege tryggingstiltak.

### **§ 10 Diverse arbeid**

Reising, riving eller reparasjon av bygning, graving eller anna arbeid på eller ut mot offentleg stad der det kan bli fare for ferdsla, skal på førehand meldast til politiet. Politiet kan fastsette korleis arbeidsstaden skal sperrast og krevje andre tryggingstiltak til vern for publiikum.

### **§ 11 Vedlikehald av bygning m.m.**

Ved vedlikehald av bygningar m.m. på eller ut mot offentleg stad pliktar den ansvarlege for arbeidet å setje opp avvisarar som gjer det tydeleg at det er farleg eller til ulempe å ferdast der.

### **§ 12 Avvisarar**

Når det er fare for at snø eller is kan falle ned frå hustak mot offentleg stad, skal eigaren straks sette opp avvisarar som gjer det tydeleg at det er farleg å ferdast der, og snarast syte for at taket blir rydda.

### **§ 13 Fjerning av sperrer**

Sperringar, avvisarar, stigar e.l. må takast bort når arbeid som nemnt i §§ 9, 10 og 11 er gjort eller når faren eller ulempen som er nemnt i § 12 ikkje lenger er til stades.

### **§ 14 Ferdsla på frosne vatn eller sjø**

Politiet kan av tryggingssgrunnar sette forbod mot eller gje regulerande føresegner for ferdsla på vatn eller sjø som er frose.

## **Kapittel IV: Reinhold på offentleg stad**

### **§ 15 Fortau m.m.**

Eigar av hus eller grunn mot offentleg stad pliktar å halde reint fortau og rennestein i tettbygd strok innanfor grensene til den tidlegare Volda kommune og gjere reine lys- og luftegraver som er knytt til eigedomen.

Reinholdet skal gjerast slik at det vert til minst mogleg ulempe.

Oppsop e.l. må ikkje leggjast i kloakksluk.

### **§ 16 Snøfall og takras**

Eigar av hus eller grunn mot offentleg stad pliktar å rydde fortauet utanfor eigedomen for snø og is etter snøfall og takras. Plikt til å rydde fortauet for snø og is etter snøfall gjeld likevel berre i tettbygd strok innanfor grensene til den tidlegare Volda kommune.

### **§ 17 Strøplikt**

Eigar av hus eller grunn mot offentleg stad i tettbygd strok innanfor grensene til den tidlegare Volda kommune pliktar å strø fortauet utanfor eigedomen når det er glatt.

### **§ 18 Avløp for vatn**

Eigar av hus eller grunn mot offentleg stad skal syte for at avløp for vatn i fortau, rennestein, grøft e.l. vert halde ope.

## **Kapittel V: Hindre tilgrising**

### **§ 19 Hindre tilgrising o.l.**

På, ut over eller like attmed offentleg stad er det forbode:

1. å kaste glas, flasker, spikar, papir, fruktskal eller anna avfall,
2. å grise til med måling, tusj, sprayprodukt e.l. på noko overflate mot offentleg stad, under dette på eller ved bygning, gate, veg, park, anlegg, innretningar og framkomstmiddel,
3. å hengje opp kunngjeringar, plakatar, e.l. utan at politiet har tillate dette. Dette gjeld likevel ikkje oppslag på tavler e.l. som kommunen har godkjent til slikt bruk, eller oppslag på eigedom om tilhøve som berre høyrer eigedomen til eller næringsverksemda til dei som bur der. Det er forbode å rive, skade eller skjemme oppslag som er lovleg sett opp. Oppslag skal fjernast når dei er forelda.
4. å urinere.

## **§ 20 Avfall**

Den som driv med sal frå portrom, kiosk e.l., eller som driv anna liknande næringsverksemd på eller ut mot offentleg stad, skal syte for at området ikkje vert skjemt eller skitna til av verksemda og pliktar å syte for at det blir sett opp mange nok korger for papir og avfall.

Den som arrangerer tilstelling på offentleg stad, skal syte for at papir og anna avfall blir fjerna etter arrangementet.

## **Kapittel VI: Offentlege anlegg**

### **§ 21 Kyrkjegard**

På kyrkjegard er det forbode å sykle, ake eller å drive sport, leik eller anna som ikkje sømer seg der.

Det er forbode å trengje seg inn på kyrkjegard når den er stengd for besøk.

Lause hundar må ikkje sleppast inn eller takast med på kyrkjegard.

## **Kapittel VII: Dyr**

### **§ 22 Husdyr m.m.**

Det er forbode å la hest, storfe, sau eller geit gå laus på eller ved offentleg stad utan forsvarleg tilsyn.

Sirkusdyr eller ville dyr må ikkje førast på offentleg stad utan løyve frå politiet.

### **§ 23 Farlege hundar**

Politiet kan avgjere at hund som kan plage menneske eller dyr på offentleg stad, skal haldast i band eller ha munnkorg.

### **§ 24 Bandtvang m.m.**

1. På offentleg stad er det forbode å la tise gå laus i løpetida.
2. Hund skal vere utstyrt med halsband med namn, adresse og telefonnummer til eigaren eller den som har ansvaret for hunden, eller vere lovleg merka på annan måte.
3. Eigar eller den som har ansvar for hund pliktar straks å fjerne ekskrement som hunden let etter seg på offentleg stad.

### **§ 25 Sal, avliving o.a.**

Politiet kan ta hand om hund som går laus i strid med §§ 23 og 24 ovanfor. Let den som eig eller har hunden vere å hente den innan ei veke etter at han/ho er varsla personleg eller ved lysing i pressa, kan politiet selje eller avlive hunden.

## **Kapittel VIII: Arrangement på offentleg stad m.m.**

### **§ 26 Søknadsplikt for arrangement på offentleg stad**

Den som på offentleg stad vil lage til arrangement som i hovudsak er av underhaldande, kunstnerisk, selskapeleg eller kommersielt slag, som har ein storleik som opplagt vil føre til

behov for omfattande reguleringar av ferdsla eller vakthald, må søkje om dette innan ein frist som politiet set. Politilova § 11 gjeld tilsvarande.

**§ 27 Meldeplikt for allment tilgjengeleg arrangement utanfor offentleg stad m.m.**  
Den som vil lage til eit arrangement som er allment tilgjengeleg, må i god tid sende melding til politiet. Dette skal gjerast sjølv om arrangementet ikkje går føre seg på offentleg stad, når det er truleg at det vert naudsynt med polititilsyn for å sikre ro og orden eller avvikling av trafikken på grunn av storleiken på eller karakteren av arrangementet. Plikt til å melde frå gjeld og samkome med dans eller anna tilstelling som i hovudsak er av selskapeleg eller underhaldande art for medlemmer av ei foreining eller liknande samanslutning. Politilova § 11 gjeld tilsvarande.

## **Kapittel IX: Born**

**§ 28 Offentleg dans e.l.**  
Born under 15 år har ikkje tilgjenge til offentleg dans eller liknande allment tilgjengeleg tilstelling utan at dei er saman med foreldre eller andre føresette.

## **Kapittel X: Ymse føresegner**

**§ 29 Forsøming av plikt**  
Forsømer nokon å utføre det vedkomande har plikt til etter desse vedtektene eller etter pålegg gjevne med heimel i vedtektene, kan politiet på vegne av vedkomande setje dette i verk. Den som har forsømt pliktene må dekkje utgiftene.

**§ 30 Straff**  
Brot på denne vedtekta eller pålegg gjeve med heimel i vedtekta vert straffa etter politilova § 30 nr. 4, dersom ikkje tilhøvet kjem inn under strengare straffepåbod.

**§ 31 Iverksetjing**  
Denne vedtekta tek til å gjelde 1 månad etter at ho er stadfesta av Justis- og politidepartementet.

Politivedtekta for Volda kommune, stadfesta 07.01.83, fell bort frå same tid.

xxxxxXxxxxx